

上海史料叢編

紫隄村小志

上海市文物保管委員會編

一九六二年

上海史料丛編簡例

一、丛編所輯为上海地方历史文献資料，以稿本及旧抄本为主，包括流傳不广的重要刊印本。

一、为了保存文献，編輯工作仅限于对所选各著解題、书跋、断句或分段，間作必要的按語之外，概不进行注釋、考訂、校勘及增补工作。

一、排印用簡体字。其中有些是代用字类，如「徵」之于「征」、「廠」之于「厂」等，則改采繁体字，以免昔今異义。

一九六一年七月上海市文物保管委员会

紫隄村小志目錄

卷前

各志稱名

方里

各邑疆界

戶籍

水港開浚

橋梁

舊蹟

人物（寓居附、後同）

卷中

國朝人物

詩詞

本郡邑建置沿革

紫隄名義

田畝字號

近村

神廟

墳墓

風俗

內則

文集

紫隄村小志

卷後

人物續錄

江村雜言

人物補傳

古文附錄

紫隄村小志弁言

鄉城皆王土也。然村蹟入縣志則已略。入府志則尤略。以略始者久而必遺。况地兼兩郡三邑如紫隄者。安所得彙各乘而詳觀之。此村志之所由作也。按紫隄原稱蟠龍塘。於吾嚮爲西南界。宋以前莫可考。其建廟築橋則自元迄明僅存歲次。而人物之不傳者已多。余嘗經行其地。略觀土俗民風。或爲余言。一切往蹟俱在蒼茫明滅間。及今不志。漸將并此可志者亦泯軼矣。且古之君子所爲正己以正人者。不越勸戒兩端。誠即可志之言行節義。一一表而出之。使旣爲善者曰。善固人不我忽也。未爲善者亦曰。善乃人所共尙也。則善者益勉。而不善者亦知懲。移風易俗之功。胥於是乎賴。行見邑采其可傳者。郡采其尤可傳者。郡邑之志因是益備。斯略者不至於遺。而是鄉隨以不朽。寧謂界兼兩郡三邑之村。其爲志可或已哉。平陽耜雲子搆其尊人新著一書。介余弟笠南端以相示。展閱大略。實獲我心。不止曩日經遊宛乎在目也。聊識數語而歸之。時康熙戊戌歲嘉平月立春前二日。補亭王晦撰。

紫隄村小志凡例

玉峯有用里志。古嚮有潛溪志、臨江志。皆國朝新帙也。由鎮及村。則紫隄亦有可述者。因爲小纂。并例其由。永安識。

一 村境褊陋。何足云志。緣係生長之地。且今昔有殊。故就所知者率錄一通。一切巷蹟原在蟠龍塘兩岸。凡所見書策有稱及蟠龍塘者俱略載入。非故旁及。聊備覽也。

一 纂志宜別人物游寓等項。但彙三邑以得一村。而可紀者實無幾何。分之則益見少矣。合訂成編。遂乖往例。

一 人物非已故者不載。流寓非積歲定居者不載。

一 所述止荒村三里中之事。故隨所見聞。不嫌瑣屑。正須椽筆芟正。以冀留貽。倘以冗碎見嗤。則滋愧矣。偶有遠至五里許者。以人物故附及之。

一 志亦紀事之書。宜從史例。稱名無諱避前輩之理。各照卷列傳。並照所見舊本增刪錄載。後卷另附雜言。既係拙撰。則稱謂自宜慎重。不敢與前卷混。

一 一切人物事蹟。必尙有不容略者。顯候錄示補入。

紫隄村小志目錄

卷前

各志稱名

本郡邑建置沿革

方里

紫隄名義

各邑疆界

田畝字號

戶籍

近村

水港開浚

神廟

橋梁

墳墓

舊蹟

風俗

人物（寓居附、後同）

卷中

國朝人物

內則

詩詞

文集

紫隄村小志

卷後

人物續錄

江村雜言

人物補傳

古文附錄

紫隄村小志卷之前

平陽汪永安叟否輯錄

同學侯 棠南蔭

摘參

秦 立雲津

各志稱名

蘇州府志所載嘉定止五村。其第四村曰諸荻巷。

松江府志首卷鄉保市鎮圖稱諸翟巷。後載市鎮六

十六所。第三十二所曰諸翟巷。注曰。屬上海三十保。俗呼諸地上。嘉定縣志稱諸荻巷村。注曰。在

縣西南五十里。係十四都字字號。上海縣志舊志稱諸翟巷市。注云。在三十保。俗誤呼諸地上。新

志去市字。祇稱諸翟巷。在本保二圖。青浦縣志稱蟠龍塘。係三十四保一區东六八圖。

本郡邑建置沿革

詳一統志、廣輿記及府志、縣志。本村屬蘇境者。舊係崑山地。自宋時立嘉定縣。爲臨江鄉。後改依仁鄉（係南珍字圩）。屬松境者。本秀州華亭地。元立松郡。增置上海縣。爲高昌鄉（係稱字圩）。故明又分立青浦縣。爲北亭鄉（係人字圩、官字圩）。

方里

村在蘇郡東南隅（距城百八十里）。松郡西北隅（距城六十里）。卽嘉定西南隅。上海西隅（距城四十里）。青浦東北隅也（距城四十里）。東西可一里。南北約半里。

紫隄名義

本名曰鶴村。相傳肇居是村者爲諸翟二姓（或曰狄姓）。故有諸翟之稱。諸字各志皆同。又稱諸地者。以兩郡三邑交界而訛也（惟蘇州志稱荻、義未詳、或云吳淞未浚、盈港俱葭葦之屬、蟠龍江兩岸尤甚）。後以村西多紫薇花。自四月至八月沿隄香色不絕。因名紫隄村。亦名紫薇江。其徑曰蟠龍塘者。以村在兩岸而借水以爲號也。

各邑疆界

凡郡邑接壤多以水爲界。紫隄村獨否。塘北屬嘉定（本華亭高昌鄉三十二保、宋立縣時割屬之）。塘南及東灣稍南沿岸約數椽地屬上海。其北宇則嘉定也。龍蟠橋而西至侯參政舊宅亦屬上海。再西則

又嘉定也。故有一廛而前後或左右兩郡者。過鶴龍橋而南而西乃屬青浦。總計屬嘉定者十四。屬上海者十五。屬青浦者十一。此村境之大略也。青浦縣志載盤龍鎮而無諸翟村。蓋志修於康熙八年。時紫隄戶口屬青邑者未及數家。定以不成村市略之（按修志時合三十保東六八圖人字圩官字圩居民計之、圩止百四十一丁）。今則稍稍稠密矣。

按嘉邑二十七都所隸各市鎮。俱在吳淞江之北。惟紀王廟及本村在江之南。明嘉靖間李邑尊資坤列其地爲下區。本村蓋依仁鄉十四都一隅也。

田畝字號

本村畝界田畝。原編皇字號。往時水港淤涸。屢經歲歉。糧重多逋。前令余。政頗嚴峻。每征比輸及。輒懸示叱爲頑排。里民愧憤甚。會餘杭趙公下車。各圩懇稟分號以別之。今之字字號乃康熙十一二年所改立也。

戶籍

康熙甲子乙丑間。合計一村民戶約三百餘。越三十年增至約七百餘。一切屋宇多坐乾向巽。惟玄壽觀係正南。

近村

正北二里曰曹家巷、季家巷、金家巷。再北爲調字圩（再北爲朱家涇）。金家巷南曰堰頭（堰在繞龍浜中）。正南一里曰牌樓頭。再南爲陳家巷、馮家巷。再南爲八字橋。正东一里曰潘家橋、管家巷、新嘉里（俗訛新街衙）。再东爲夏家橋、秦家橋。再东爲莊家涇。其南爲陳思橋（津漕鎮）。正西一里曰高陳巷。再西爲彭家橋。西南爲姜家庫（彭家橋之西爲盤龍鎮）。

东北一里曰陸家巷。南爲池圈。再北爲槿樹園。其西爲南北張巷。槿樹園东爲周家巷、陳家角。再北爲徐家橋。西北二里曰行前（一名方亭里）。再西北爲翟家巷。再西北爲蕭王廟。南爲陸家巷。再南爲西場角。西場之东爲杜家巷。西爲王家橋。再西爲李庫（卽梅雪村）。其东南卽彭家橋。东南二里曰葉家庫。西爲田肚。稍南爲唐家庫。东爲薛家庫。南爲長浜。再东南爲謝家巷、陶家橋。西南半里曰田肚裏。直西爲徐家浜。西南爲莊裏。直南爲羅家巷。西爲洋涇上。

附紫隄村賦 古吳东鄙。大江南偏。介兩郡以得聚。總三邑而增廛。橫川委折。蟲宇纏綿。岸以紫薇而荻悴。沼以芙蓉而香聯。浦則飛鶴杳渺。塘則蟠龍蜿蜒。东寺西觀。閭井迴旋。花紅樹綠。景物鮮妍。非盤谷而彌藂茂。似曲水而可流連。粵稽明季。首推上谷。三鳳蜚名。六龍

著族。科第則累世增榮。文章亦歷時相服。於時主持壇坫。扶獎人倫。膺門屢聚。楊席鱣陳。願奉漿於下列。競執贄於後塵。迨乎轉乾坤。際鼎革。判盛衰。隔今昔。風景在而山河殊。繁華歇而滄桑易。思曼之風流頓盡。子敬之人琴足惜。守城則巡遠身亡。殉國則裹融命畢。攬里巷而簪齒爲墟。溯閱閱而棧題胥折。羌微惘兮徒滋。雖侘傺其何益。若乃干戈寧靜。海宇昇平。遠郊無鈴鐸之警。比戶有絃歌之聲。童持講義。士撥吟檠。文壇則翩翩后進。詩社則落落老成。且也境既幽遐。風能勤儉。民復耕桑。商依市店。無紛華之相關。有餽糲之克贍。因之苦茗濁醪。盈甌滿杯。晨琴夜弈。淡菊寒梅。或懷人而繾綣。或逢賓而追陪。寂歷荒村。依稀樂土。土著新楹。寓公舊廡。吾本新安。遷由遠祖。既歷葉而喬居。亦久安其環堵。有江給釣。潮頗安閒。無峯供眺。路不嶮艱。免勞禽之思填海。何愚叟之勤移山。恍王維之輞川里。賽李愿之太行間。然而如面難齊。翻雲可慨。或曲蓬而依廡。或芳草而爲艾。數停勞而忘思。須值豐而多懶。逞氣矜以見雄。持武斷以貽害。此豈非有心者早當杜漸防微。積小以成大者乎。北亭兮高昌。青溪兮上洋。緊維嚶水之地。爰號依仁之鄉。彙數村於四野。免一里之孤芳。所期共適清寧。無分疆域。墅窄心寬。水曲人直。衾影以咎竄防漸。須麋以寧馨彌力。互策勵以還淳。各辛勤而種德。庶幾雍熙之俗斯推。而詬誶之音并息。然則翟存往姓。諸無幾家。村裏浣花之韻致。隄分植柳之風華。浮

名燭火。濁富朝霞。方寸浪枝求之念。七尺無綫褶之加。和風兮有味。皎月兮無瑕。蛙成鼓吹。鳩未喧譁。藉衡門以栖止。擅樂事其何涯。乙酉季春中瀚、平陽叟否氏艸於借菴軒。

水港 并疏浚

近村支港頗多。未盡詳悉。祇就所知者錄之。至一切池沼。無關重輕。概不及也。

蟠龍塘 明一統志稱龍蟠浦。蘇州志引郊廛疏稱松江南岸大浦十八。第一條曰小來浦。第二條曰盤龍浦。嘉定志曰。在嚴伯浦之東。高家浜之東南。接華亭縣之松塘。華亭志曰自城東華陽橋。北絕俞塘。過六磊塘。過泗涇。絕橫塘。又過蒲匯塘。遵朱坊橋以入淞江（按松江志圖經、惟江口稱盤龍浦、餘俱稱盤龍塘、其入江處曰盤龍匯、長共八十里）。上海志曰。通江諸水。舊圖經以趙屯、大盈、顧會、崧子、盤龍爲五大浦。盤龍從府郭來。絕橫塘入泖。其迤東爲沙岡塘。爲小萊等浦。青浦志曰。盤龍浦在崧子浦東。其上流曰盤龍塘。委蛇曲折。如龍之蟠。故名。南通蒲匯塘。北出吳淞江。按自華陽橋至吳淞江。中隔蒲匯塘約二十里。其南爲南盤龍塘。北爲北盤龍塘。康熙初里圩畫江村地圖曰龍江。共二千五百五十七丈。嘉定縣二千十三丈。上海縣五百四十四丈。闊約五丈餘。深約三尺。則指本村之北蟠龍塘也。本村距吳淞江徑約四里。水道紆曲倍之。

小萊浦（當作淩）長二千一百九十丈。闊七丈。深三尺五寸。南通夏皮涇、曹涇。北出蟠龍塘。本村西偏與雙鶴浦口相對者是也。係上青交界。

大淩浦 在本村上邑界。永福禪院之東約數武。往時頗深闊。堪輿家言。浦係龍形。兩窰墩爲龍角。兩井爲龍眼。居其地者當致南面。元至正間。里人錢鶴皋恃才自負。欲實其言。因加疏濬。會徐達破松江。督民輸磚。一時激變。鶴皋乘勢起義兵。赴姑蘇援張王士誠。未幾兵敗死節。舉家生瘞。青田劉基亦嘗言東南有王氣。至是奉命巡視。令塞浦以厭之。港遂淤成平壤。村南斷港約里餘。前後不通。今尙稱大淩浦。蓋塞而未盡者也。井南數武凡兩處。周圍各約丈許。塞未匝月。輒復凹窪積水。雙澤澄然。俗名卵子潭。國初漸亦平滿。今直不復得其處矣。按墩井俱近永福禪院。浦既填絕。墩亦剗削。僅存遺阜。廣不數尺。其稍南一址。明季爲侯氏乳伯葬所。互見坟墓窰墩注。

附青浦志曰。大淩浦長五百五十二丈六尺。闊四丈。深三尺。南通蒲匯塘。北通橫瀝河。分繞長浜市河。係三十四保二區。按此大淩浦之屬西南者。

雙鶴浦 一名沙鶴浦。在本村西偏。相傳南宋時有二鶴來集水次。久之飞去。遂以名村。浦南出蟠龍塘。北通方亭浦（按雙鶴浦自南而北爲張家浜、繞龍浜）。

單家浦 俗訛爲錢家浦。卽玄壽觀前港也。北通里沙港、黃家浜。合方亭浦南出蟠龍塘。

洪涇 南通里沙港、單家浦。北穿方亭浦。

里沙港 在村北一里。港南曰馬衙港。北曰陸家巷。西通單家浦。東與斗門涇合流。稍北與黃家浜

合流。再東則蟠龍塘也。港通單家浦處兩岸有羊浜。浜西南曰劉家巷。

黃家浜 東由里沙港出蟠龍塘。西越洪涇通雙鶴浦。

斗門涇 俗訛對門涇。在村東一里。南出蟠龍塘。北出里沙港。明弘治十一年濬嘉定各涇浦。深闊

視舊加倍。斗門涇亦其一也。

方亭浦 沈氏宗譜曰。方亭者。秦時亭長方昕所建也。亭前水港以亭得名。宋元之世。沈氏宗人依浦

爲村。名方亭里（在村西北二里、俗呼行前、蓋其地舊有市廛、以布行篋行輳集得名）。浦南北俱

出蟠龍塘。長約五六里。兩旁居民頗繁。竹樹深邃。

郭浦 在新嘉里北。出蟠龍塘。對斗門涇口。南至張方廟金家浜出小涇。通橫瀝。

長浜 在村東。東通莊家涇。西通郭浦。

傅家浜 在村南一里。往時傅氏稱富。其產業方整如棋局。名一眼田。言彌望無參錯也。浜亦以傅

氏得名。東通大涇浦。西通小涇浦。係上青交界。

張家浜 在村北半里。西通雙鶴浦。東係浜頭。兩旁坟墓甚多。或曰其地較高。利營丙舍。然頗罕佳者。

抄娘港 在新嘉里東北。南出蟠龍塘。按港在龍塘之北。而東北一隅係上海界。

高涇 在村西二里。南出蟠龍塘。北通方亭浦（其北曰大頭浜）。

小蟠龍江 一名張占浦。在村北二里餘。北通莊家涇。南至秦家橋。卽蟠龍塘也。

廟涇 在蕭王廟北。东通方亭浦。

徐家浜 在村之西南。文福橋所跨也。东出小涑浦。西北出蟠龍塘。再西爲东洋涇。

沙家浜 在村南二里餘。東通北郭浦。西通小涑浦（按同一郭浦也。里人謂自沈橋而南至徐亭橋之

东、曰東郭浦、顧家橋南八字橋北、曰北郭浦、八字橋南界於东西漾藍浜之間、曰南郭浦、則去

本村較遠、不悉記矣）。

东洋涇 在村之西南。北出蟠龍塘。南通夏皮涇。

唐杜涇 在村西高陳巷。南出蟠龍塘。北通雙鶴浦。

自吳淞江收蟠龍塘。第一支港曰野人涇。屬嘉定。第二支港曰小娘港。屬上海。穿西荒場而东曰

柴蕩裏。亦出吳淞江。

宋景祐二年。守鄉郡范仲淹開五大浦。按開濬龍江。遠莫能紀。今祇就可考者錄之。文正有上宰

相論水利書。中云。松江一曲。號曰蟠龍。父老傳云。出水尤利（文見郡邑各志）。